

Kerisimasi o le sailiga i uiga silisili

LPS Tavita



Ua laasia nei le 2000 ni tausaga talu le faaali mai o le Atua i le lalolagi e tusa i le taofi a Kerisiano. E foliga o se taimi umi ae leai, ua se emo lava a le mata i le fua a le taimi, o se iota e le iloa atu i le vaai pe a tilotilo i le ata lapo'a o le tala i le tagata e faitau miliona tausaga, pe faitau piliona foi pe a tilotilo i le ata o le foafoaga atoa, molimau mai le Saienisi. I lona tumu, o lo tatou tualagi¹ o le to e le gata, o se laolao e lē mafuatia, e 200 piliona aniva²e aināina, ma fetu e faitau piliona i totonu o na aniva. Ae le ta'ua le mano o paneta e sili atu. O se faitauga lata mai lena e fua i mea ua mafai ona asia e satellite su'esu'e. Ae talitonu saienitisi e le'i taitai ona ila le tafa i so tatou iloa ma se taumate - tainane i o tatou taimi. E faitau miliona maila le va o le tasi fetu ma le isi. E aumai ai sina ata o le faatauvaā tele o lo tatou lalolagi i le ata telē o se foafoaga uiga ese ma le ofoofogia. Tatou te tau maua ai foi sina ata o le faatauvaā o se silafia poo so tatou iloa i le Atua ma le Foafoaga.

O le sailiga i le Atua o le sailiga i le Uiga, e pei ona avea le tala i Makoi ma se faatusa sili o se na su'ega maualuga; molimau foi le to'atele o le ausaili mai augatupulaga. O le sailiga i le uiga o lo tatou si'omaga. Le uiga o lo tatou ola ma le soifua ai. O se tupua e tau ilo. Auā a tatou fai atu o le Atua e faapea, ona faamasino mai lea o lo tatou lē atoatoa i le

¹ e soaina le upu Peretania 'cosmos' ma lona uiga

² e soaina le upu Peretania 'galaxy' ma lona uiga

mafaufau, agaga ma le tino. E faamasino mai le pogisa ma le gaogao sa mua'i iai a o le'i tino mai le malamalama (Kenese 1).

O se sailiga foi i le Fuaiupu Atoa. O le mea lea e faigata ai ona tusi e se tasi se periota i soo se finauga e ta'u ai le Atua. I le sailiga mo le Uiga ua mafua ai ona tatou ave le mua i ni aga poo ni amioga e pulea ai se nuu, se malo, tainane o le lalolagi. O le faavaeina o le taupulega a Malo Aufaatasi o se molimau i le uiga saili, ma o se ausiga mata'ina mo le fanau a tagata i la latou sailiga mo le Uiga, poo i talitonuga lotu, poo le tofa saili a o tatou tua'a e ala i pulega lelei; e talitonu o le Atua lava lea i lona faaali mai i le musumusuga a o tatou lotofuatiaifo ma le mafaufau tatau. Fai mai o le 'aloiafi paia i le tagata e taiaina lana sailiga pe a lagonaina ma tuuavanao i ai.

O le uiga o le Atua poo le Atua le Uiga lea na tusi ai loane le Soo, o le Atua o le Alofa lava ia. Auā i le mau a Keriso o le alofa na te faatagataina le tagata. O Iesu o lena Tino mai o le Atua i le Alofa ua atoa.

E le muta le faiva o le faasoa mafaufau pe a poo fea le Atua, ae i le taimi o le Kerisimasi e toe faamanatu mai ai le taua o lo tatou faatuatuga i le malosi o 'lelei', i se lalolagi vevesi. Fai mai foi le aupopoto ua amio i tagata le tagata talu lona ui mai i se gasologa maualalo o se meafaiola a le taimi, ae peita'i e le moni atoatoa lena taofi. Ina ua tuana'i pulega a malo

ma Lotu mo se faitau seneturi i le suafa o le Atua ma le tagata malamalama, o loo pogisa pea nisi itu o le lalolagi. Ua tula'i mai ni lotu ua anau e faatutu a latou pule aoao i tagata, ma ua le poi foi e fasioti ma faaumatia, ma faia soo se soligatulafono ina ia tau lau o a latou miti.

O loo fevaevaea'i pea le lalolagi ona o talitonuga lotu, nuu ma malo, ua mafua ai taua ma maseiga i va o tagata ma lanu. A fesili pe mafua i se a, o le tali e fesoota'i tonu i lea sailiga mo le uiga. (Poo lea foi fetotoa'iga ona o le mau eseese i le Atua ma lona uiga). Fai mai le Isalama ma le lutaia e maua le tali o le sailiga i le usita'i atu ma le faamaoni i le Atua. Ana fai o lena po ua tau lau o le faanaunauga sili o le Kerisimasi, o le filemu i le lalolagi ma le finagalo alofa o le Atua i tagata, ae leai. Sa vatau ma o loo taua'imisa pea lotu i le auala tonu e faatino ai lena usita'i. E mafua ai le siitaua, ma fasioti, ma faataugā, ma faasauā, ma faamata'u tagata, ona o le manatu o se vaega lea o le usita'i atu; o loo faia pea e nisi i le igoa o se lotu ma le suafa pa'ia o le Atua.

O le alii o Dawkins, o se polofesa lauiloa o le saienisi i le tupuaga o mea, ma se tasi e lē talitonu i le Atua. Ae na ia tusia se tusi e foliga e lagolago ai le mau Kerisiano. E manatu Dawkins, poo a ni faaletonu o le mau a Kerisiano, ae a fai fai tafi esea mai le lalolagi, o lona uiga o se lalolagi faanoanoa.

E faatatau tonu lana tala i le tula'i mai o ni vasega o le igoa Isalama e pei o le Isis ma isi. E faigata ona talia i lona mafaufau se lalolagi e pulea e nei faalapotopotoga lotu e sui a'i. La lea e oo i se tasi e le talitonu i le Keriso poo le Atua, na te talia le sao taua a le mau a Kerisiano; ona pau lea o le malosi i le lalolagi o loo taofiofia le i'umaea.

La lea e tele fili o le sailiga. E vaapiapi le ala e tele foi ona magaauala. O loo faatali mai ai atua o le ala e faalavelave ma lamalama; e pei o Herota o le faatusa o soo se pule e tete'e i le sailiga i le moni. Faapei o le urosa i le sopo toe fo'i a i'a i la la latou sailiga o le matāvai. Ae mo le to'atele, e mafai lava ona 'alofia le fili, faapei o makoi i le tala.

Tatou te taunapa pea i uiga silisili e iloa ai le Atua. Tatou te lagonaina ai ma le fanau lona 'aufaatasi pea ma i tatou i totonu o aiga, ekalesia, nuu ma falefaigaluega. E moni, tatou te naunau e faailoa atu le Atua o le Feagaiga Fou e ala ia tatou mau faalenuu ma taga. Ae o le fesili, e aumā pe afai e aunoa ma se uiga silisili (faaleAtua) e atagia ai? Molimau Mika, e iloa le Atua i le mea e fai ai le alofa, amiotonu ma le lotomaulalo. Auā 'ana leai na mea, po ua leai se lotu Kerisiano. Leai fo'i se uiga.

Auā i lena vao uiga—ua tatou manatu e afua mai le Atua—ua mafua ai ona tatou galulue fe'oe'oea'i ma faatino o tatou faiva. I lena vao uiga na faavae ai le tautua ofoina atu, ma mafai ai ona tatou faafetauia ni

lu'i, a'ea ni 'olo, onosa'ia tiga o le olaga, ma malo i le fili. I nisi fo'i taimi tatou te faia'ina, ae faaauau pea le sailiga mo uiga silisili.

O le tala a Kerisiano e tu ese mai, o le tala i le Atua na saili mai; o isi tala o ni sailiga i le Atua e ala i le malosi faaletagata. Fai mai tusiga paia o le sailiga e mafua i lona lava agalelei mutimutivale, e pei ona molimau faata'oto a le Alii lava ia. O lea foi le faanaunauga i la tatou sailiga, ia tatou fetaia'i ma le Alii i lena mafaufau ma le agaga e tasi, aofa'ia e le perofeta Eperu e pei ona ta'ua i luga i upu e tolu - alofa, amiotonu, lotomaulalo (Mika 6.8).

I na uiga silisili, aemaise o le lotomaulalo, tatou te tausia ai lo tatou va ma le tasi uso a tagata, lo tatou va ma isi meafaiola a le Fofoaga, lo tatou va ma lo tatou si'osi'omaga, ae sili lo tatou va ma Le na Faia i tatou uma.

Fai mai le upu faasinoala a le agelu i leoleo mamoe, tou te maua le pepe o loo ta'oto i le fale o manu. Auā i le falemanu e afua ma taunuu i ai le sailiga i le uiga loloto o le Kerisimasi.

Na ulua'i lomua lenei faasoa i le OLA L37 2014.